

Litteratura 32 plaina da maletgs

■ (anr/fa) Dapi l'onn 1980 cumpara en la retscha Litteratura mintg'onn in tom cun novs texts rumantschs. Venderdi è vegnì preschentà il nov tom, la Litteratura 32, a Domat a chaschun dals Dis da Litteratura a Domat. La retscha Litteratura è dad ina vart ina plattafurma per novs texts litterars e da l'autra er in forum per il barat litterar tranter auturas ed auturs. Editura da la Litteratura è l'Uniu per Litteratura Rumantscha (ULR). Dapi l'onn passà cumpara la retscha tar la Chasa Editura Rumantscha. «Per l'ediziuon 32 è vegnì tschernì il tema Litteratura e purtretts», ha ditg *Aita Dermont-Stupan* venderdi saira en la Sala Tircal a Domat. Ensemen cun *Annemieke Buob* ha ella preschentà la Litteratura da quest onn. Las lavurs da redacziun han Aita Dermont ed *Uorschla Natalia*

Caprez Brühlhart procurà. «Las tematicas tanschan da lirica, prosa curta fictiva, essays fin ad intervistas cun artists davart lur lavur sco era texts or dal truclet, translaziuns ed ina recensiuon», ha infurmà Aita Dermont, «cun plaschair avain nus pudì constatar che 40 auturas ed auturs rumantschs han inoltrà contribuziuns a questa litteratura.» Il resultat saja uschia in tom fitg varià e frestg, ha ella agiuntà. «Cun ramassar las differentas contribuziuns hai jau era constatà che litteratura e purtretts han tshertas parallelas», ha menziunà Aita Dermont, «texts pon esser purtretts e purtretts pon era raquintar entiras istorgias.»

La Litteratura 32 survegnan ins en las librerias, ins la po retrair dentant era per 20 francs plus porto directamain per internet: www.chasaeditura.ch



Annemieke Buob ed Aita Dermont-Stupan han preschentà la Litteratura 32.